

Pasar percuma untuk semua

JAM 8.30 pagi, penyumbang dan pengunjung mula berkumpul di Taman Sukan Lasak, Seksyen 13, Shah Alam. Ia menjadi lokasi #Eco Free Market yang julung kali diadakan oleh Majlis Bandaraya Shah Alam (MBSA) dengan kerjasama NGO, Group Free Market, Taat Foundation, Food Aid Foundation dan AD Prihatin (Alumni UITM) pada 23 April lalu.

Lebih 1,500 pengunjung diingatkan pihak penganjur agar menjaga etika dalam mendapatkan 'apa sahaja semuanya percuma'. Tepat 9 pagi, bacaan doa dimulakan sebelum acara amal ini dimulakan. Sebagai penghormatan, laluan pertama diberikan kepada 120 anak yatim dari Rumah Kasih Harmoni, Paya Jaras; Teratak Nur Baraqah, Seksyen 24; Rumah Amal Al-Firdaus, Seksyen U16; dan Rumah Anak Yatim/Asnaf Kajang, untuk memasuki ke gelanggang pasar percuma itu.

Ketua Bahagian Korporat & Perhubungan Awam, MBSA, Shahrin Ahmad berkata, Program #Eco Free Market diadakan sempena Hari Bumi pada 22 April lalu.

Program tersebut merupakan platform komuniti Shah Alam untuk menyertai aktiviti amal dengan mengedarkan barangan keperluan

secara percuma kepada orang ramai, di samping mengeratkan hubungan sesama komuniti setempat.

"Konsep Free Market Shah Alam adalah *Less is More* yang bermaksud menguruskan pemberian barangan terpakai dan meminimumkan kepada yang memerlukan. Ini merupakan alternatif untuk mengelakkan pembaziran serta mengurangkan barangan terpakai ke tapak pelupusan."

Antara barang yang disumbangkan oleh individu dan NGO seperti pakaian, aksesori, perhiasan rumah, permainan kanak-kanak, alat elektronik, alat tulis dan bahan bacaan. Di samping itu ada yang menghulurkan sumbangan makanan seperti makanan, minuman, dan barangan dapur bagi mereka yang memerlukan.

Pihak MBSA turut menyediakan beg bermotifkan *eco friendly* secara percuma kepada 300 pengunjung terawal. Majlis Perwakilan Penduduk (MPP) Shah Alam turut bekerjasama untuk menyediakan 1,000 tapak untuk menggalakkan penyertaan komuniti setempat.

Universiti Teknologi Mara (UITM) dan Universiti Selangor (Unisel) turut memberi sokongan dengan menghantar sukarelawan bagi menjayakan program #Eco Free Market ini.



Penyumbang berbesar hati untuk mendermakan barangan.